

Is Surat Ni Epustul Pablo Ziyà Te Menge Tig-Ipisu

Is Mehitenged te Surat he Para te Menge Tig-Ipisu

Utew kew sepiant! Iyan heini ibpesavut ni Pablo hein mibpesuratan din is menge tumutuu ziyà te Ipisu wey is minsan hentei he ebpekevasa kayi he surat. Piru kenè din iyan ibpesavut he zekelà is selapì dan. Su is ketigeyunan dan, ne lavew pa te selapì su is ketigeyunan he imbegey kandan ni Jesu Kristu, ne kenà kelibutanen he azen (umbe ebpulus te wazè din pidteman). Pinaagi te Wagas he Mulin-ulin imbegey kandan is langun he kelasi te tavang he kenà kelibutanen. Ne umba iyan heeyan su geine te is langun he midtuu ki Jesu Kristu, nekepekidsevaha kandin. Ne nehimu zaan sikandan he menge anak te Megbevayà, umba egkehimu ke ebuyù dan diyà te amey zan te minsan hengkey he egkinehnglanan dan ne egkelipey sikandin he edtavang kandan.

Ne geine te amey is Megbevayà te langun he midtuu kandin, ebpesavut he menge anak sikandan te Megbevayà. Umba utew kinahnglan he edhimuwen dan is taman te egkehimu zan he ebpekepeupiya te kedezepitè dan su wey kenà mezeeti is kegkesevaha zan. Dutun te kedseysaya ni Pablo te kegkesevaha te menge tumutuu, migamit sikandin te menge petug-iringan. Is langun he menge tumutuu impetug-iring din te sevaha zà he lawa he iyan si Jesu Kristu ulu. Impetug-iring din daan is langun he menge tumutuu te valey ne iyan si Kristu vatu he zutun bunguna haazà. Si Kristu, impetug-iring din daan te ebpengesawa ne iyan impetug-iring te ed-esewaan din is langun he midtuu kandin.

Ne geine te netuenan te menge tumutuu kandin is menge ulaula he ebpekepenunuat te Megbevayà, utew kinahnglan he iyan dan ed-ul-ulahan is sungkad te netuenan dan. Ke vā dā kumbalà kinahnglan he edluwasen dan is mezaat he menge ulaula ne insun-ud dan is begu he kineiya he imbegey kandan te Megbevayà. Ne kinahnglan daan egemiten dan is menge gumaan wey pengalang he inhiman kandan te Megbevayà te kebpekidtebek dan ki Setanas.

1 ¹Iyan a si Pablo is tegisurat kayi. Nehimu a he epustul ni Jesu Kristu, *he ke và dà egkegiya, midsugù e zin, tenged te iyan egkesuatan te Megbevayà. Ibpeuwit ku heini is surat diyan te inged he Ipisu, diyan te keniyu te menge tumutuu he menge metinumanen te menge sugù ni Jesu Kristu.*

²Is Amey tew he Megbevayà wey is Nengazen tew he si Jesu Kristu, berakat he ikegagew kew zan wey tuvazi kew zan te melinawen he kebpekesavuk.

Is Tuvad Tenged te Kebpekidsevaha Tew ki Kristu

³Dekelà utew is kebpelehemati tew te Megbevayà he Amey te Nengazen tew he si Jesu Kristu su tenged te kebpekidsevaha tew ki Kristu, intuvad din kenitew ziyà te langit is minsan hengkey he meupiya pinaagi te kedulini kenitew te Wagas he Mulin-ulin. ⁴Dengan te wazè pa limbaga is kelibutan, mibpili kiw en te Megbevayà. Iyan impilia zin kenitew su wey kiw mehimu he menge sakup din he wazà igkesewayi zuen. ⁵Ne tenged te utew zekelà is gagew zin kenitew, dengan te wazè pa is kelibutan, midisip din he pinaagi ki Jesu Kristu edhimuwen kiw zin he menge anak din su iyan egkesuatan din wey tuyù din. ⁶Edeligen tew is Megbevayà tenged te utew zekelà he mekegegehèm he gagew zin he intuvad din kenitew pinaagi te kebpekidsevaha tew te mahal he Anak din he si Jesus.

⁷Su tenged te utew zekelà is gagew zin kenitew, midlibri kiw zin te silut pinaagi te kedtigis te lengesa zutun te kebpehimatey ni Kristu, ne mibpesaylu zin is menge salè tew. ⁸Kenà pinaagi te sukud is kegkegegawi zin kenitew, kekenà, utew subra is gagew zin kenita. Ne imbegey zin daan kenita is kedsavut wey ketau su wey tew metueni ke hengkey is paagi zin. ⁹Ne impesavut din kenitew is daan he in-eles he edhimuwen din su iyan tuyù wey egkesuatan din. Ne mid-isip din he zaan he pinaagi ki Kristu ¹⁰edhimuwen din heini zutun te hustu he timpu. Su mid-isip te Megbevayà he zutun edhimuwen din he sebsevaha zà si Kristu he ebayàbayà te minsan hengkey he linimbag diyà te langit wey zini te tanà.

^{11,12}Is langun he ed-ul-ulahan te Megbevayà, ne iyan kedtumana te tuyù din wey egkesuatan din. Ne tenged te iyan tuyù din, mibpili key zin is menge tumutuu he Hudiyu wey key mehimu he menge sakup din he ebpekidsevaha ki Kristu. Iyan heini tuyù din he zaan he mid-isip din. Ne sikami is menge Hudiyu he nengehuna he nemeketuu ki Kristu, umba mibpili key zin su iyan egkesuatan din he pinaagi kenami edeligen sikandin he utew mekegegehèm.

¹³Ne iring din ded daan diyan te keniyu su hein impesavut keniyu is tutuu he tuluuwen he iyan kes Meupiya he Tudtulanen mehitenged te kedlibriya kenitew te silut, nemeketuu kew ki Kristu, ne midhimu kew zaan te Megbevayà he menge sakup din pinaagi te kebegaya zin keniyu

te Wagas he Mulin-ulin he zaan he impenaad din. ¹⁴Is ked-ulini kenitew te Wagas he Mulin-ulin, ne iyan tuus kenitew he keuzemà ibegey zin kenitew te menge sakup din is langun he impenaad din kenitew. Ne pinaagi kayi egketueanan tew he keuzemà edhimesazen din is kedlibriya kenitew te kebpekesalè tew. Edeligen tew sikandin is mekegegehem!

Is Ked-ampù ni Pablo

¹⁵Ne tenged kayi, menge suled, geina te netudtulan a he mezesen is kedtuu niw te Nengazen tew he si Jesus wey zekelà is gagew niw te minsan hentei he tumutuu kandin, ¹⁶kenà egkeamin is kebpeelemati ku te Megbevayà tenged keniyu. Layun ku sikiyu id-ampù. ¹⁷Is Megbevayà te Nengazen tew he si Jesu Kristu he iyan daan Amey tew he zait he ebentugen, edhengyuan ku layun sikandin he pinaagi te Wagas he Mulin-ulin, ne ivegey zin keniyu is ketau wey ipegawagawa zin keniyu is kegketueni niw te menge ulaula zin. ¹⁸Id-ampù ku he ivegey zin daan keniyu is kebpurung kedsavut su wey niw metueni ke hengkey is langun he meupiya he egkeperateng tew keuzemà tenged te midhimu kiw en he menge tumutuu zin, ne wey niw zaan metueni he utew mezakel zutun is menge meupiya he idtuvad din kenitew. ¹⁹Ne id-ampù ku zaan he ipesavut din keniyu ke hengkey is kenà egkesukud he utew lavew he zekelà he gehem te Megbevayà he zini edterebahu te kenitew te menge tumutuu kandin. Ne iyan heini sikan is utew zekelà he gehem ²⁰he migamit te Megbevayà dutun te kebenhawa zin ki Kristu wey is kebpepinuuwa zin kandin diyà te egkekewanan din diyà te langit. ²¹Ne zutun utew lavew si Kristu kenà is minsan hentei he hadi, wey egalen, wey minsan hentei he zuen din kegehew wey kebakàbayà. Lavew pa is inggerar ki Kristu te minsan hengkey he gerar te minsan hentei guntaan wey te wazè din pidtemanan. ²²Ne is Megbevayà, midhimu zin he sakup ni Kristu is minsan hengkey he linimbag. Umba midhimu zin si Kristu he egalen te minsan hengkey su wey kiw metevangi is langun he menge tumutuu. ²³Sikitew is edsarig ki Kristu, ne iring kiw te lawa zin ne iyan sikandin ulu tew. Ne sikitew is lawa zin, ne wazà kurang te ked-ulini zin kenitew su ziyà sikandin te minsan hendei te tivuuk he kelimbagan.

Is Gagew te Megbevayà

2 ¹Dengan, henduen kew te minatey su wazè niw pa untung he wazà pidtemanan tenged te kenè kew pa zutun ebpemineg te menge sugù te Megbevayà wey tenged te menge mezaat he ulaula niw. ²Dutun he timpu mid-ikul niw is mezaat he ibayà he iyan ed-ikulen te menge etew he kuntada te Megbevayà. Midtuman kew te menge sugù ni Setanas. Iyan sikandin ebayàbayà te menge zuen din gehem diyà te hewhewanan. Iyan daan sikandin ebayàbayà te langun he kenà ebpemineg te menge sugù te

Megbevayà. ³Ne sikitew zaan, elin kiw zengan ebpen-ulaula te mezaat sumalà is mezaat he kebaya te lawa tew, wey is mezaat he isip tew. Ne tenged kayi neragkes kiw pa zutun te silut iring te zuma he menusiyà he kenà sakup te Megbevayà.

⁴Ne minsan pa te iyan en haazà, utew zekelà is hizu te Megbevayà kenitew ne utew kiw mahal ziyà te gehinawa zin. ⁵Ne minsan pa te iring kiw te minatey tenged te kenè tew kebpevineg te menge sugù din, dutun te kebenhawa zin ki Kristu, inragkes kiw zin daan su wey tew maangken is untung he wazà pidtemanan. Midlibri kiw zin te silut tenged dà te gagew zin kenitew. ⁶Ne is Megbevayà, tenged te nekidsevaha kiw ki Kristu, dutun te kebenhawa zin ki Kristu, mibanhew kiw zin daan wey kiw mekehadì duma ki Kristu ziyà te langit. ⁷Umba mid-ulaula zin heini su wey ikepeehè din kenitew is utew lavew he kezekelà te gagew zin wey kedtavang din kenitew pinaagi ki Jesu Kristu te wazè din pidtemanan. ⁸Su tenged dà te gagew zin kenita, midlibri ki zin te silut dutun te kebpeketuu ta. Wazè ki melibri pinaagi te kenita he vaal, ⁹kekenà, imbegey zà kenita is untung he wazè din pidtemanan. Ne tenged dutun, wazà etew he igkezantal zin is kedlibriya kandin te silut su kenà iyan is kandin he ked-ul-ulaha te meupiya ingkelibri zin. ¹⁰Su is kedlimbaga kenita he vegu, ne iyan baal te Megbevayà. Pinaagi te kebpekidsevaha ta ki Jesus midlimbag ki zin su wey ta meulaula is meupiya he midtegana zin en he zaan wey ta meveeli.

Is Kebpekidsevaha ki Jesu Kristu

¹¹Sikiyu is menge etew he kenà menge Hudiyu, isipa niw is daan he kebpekesavuk niw. Is menge Hudiyu, ne ebpesirkunsidar sikandan, ne egnezeanan kew zan te menge etew he kenà ebpesirkunsidar, he ke và dà egkegiya, kenè niw ebpetuusan is lawa niw sumalà is kesuguan he imbilinbilin ni Moises. ¹²Netuenan niw he zengan wazè niw upakat ki Kristu ne wazè kew iragkes te menge etew he pinili te Megbevayà. Wazè kew zaan mekeambit duen te menge meupiya he impenaad te Megbevayà kandan. Wazà egkepaabut niw he tavang te Megbevayà ne kenà duen dà taman su wazè niw metueni ke hentei is tutuu he Megbevayà dini te kelibutan. ¹³Iyan, guntaan, tenged te nekidsevaha kew en ki Jesus, sikiyu is menge etew he utew meziyù te Megbevayà dengan, impeuvey kew zin en tenged te kebpelisi keniyu te lengesa ni Jesus dutun te kebpehimatey zin. ¹⁴Sikami is menge Hudiyu wey sikiyu is kenà menge Hudiyu, midhimu ni Kristu he melinawen en is kedepitè tew su midhimu kiw zin en he teltelezuma. Pinaagi te kebpehimatey zin duen te krus in-awè din is kegkekuntada tew he iring te elavat he nekepetug-elang kenitew.

¹⁵Pinaagi te kebpehimatey zin, in-awè din is kebpetumana tew te kesuguan he imbilinbilin ni Moises ragkes is menge tulumanan su wey

sikitew is dezuwa he kelasi te etew, mehimu zin he vegu en he kelasi te etew pinaagi te kebpekidsevaha tew kandin, ne tenged kayi naawè en is kekkekuntada tew. ¹⁶Pinaagi te kebpehimatey ni Kristu ziyà te krus in-awè din is kebpekunkuntedehè tew te Hudiyu wey te kenà Hudiyu, ne midhimu kiw zin he sevaha he kelasi te etew su wey tew melikui is ked-ezapa te tutuu he Megbevayà. ¹⁷Midhendini si Kristu te kelibutan ne impesavut din kenitew is Meupiya he Tudtulanen mehitenged te kelinew. Sikiyu is kenà minge Hudiyu wey sikami is minge Hudiyu, impesavut din kenitew is kelinew te kedepitè tew ziyà te Megbevayà. ¹⁸Tenged te kebpekidsevaha tew ki Kristu, sikami is minge Hudiyu wey sikiyu is kenà minge Hudiyu, ebpekeuvey kiw en ziyà te Amey tew he Megbevayà pinaagi te kedtavang te Wagas he Mulin-ulin.

¹⁹Ne sikiyu is minge tumutuu he kenà minge Hudiyu, minsan pa te zengan wazè kew isipa he minge sakup te Megbevayà, iyan, guntaan nehimu kew en he zuma te minge pinilì din he etew. Nehimu kew en he minge anak te Megbevayà iring te minsan hentei he tumutuu kandin. ²⁰Ne sikitew is minge tumutuu, iring kiw te valey he ibpehitindeg te Megbevayà diyà te watu. Iyan si Kristu kes batu he edtukuzan kayi te valey. Is minge epustul wey ebpemeneuven te Megbevayà, ne iyan minge tukud. Ne iyan kew minge zuma he himan kayi te valey. ²¹Ne pinaagi ki Kristu nevigeran is kebeeli kayi te valey ne egkehimu heini he valey te Nengazen he zutun sikandin ed-ezapa. ²²Ne sikiyu zaan is kenà minge Hudiyu, ragkes kew kayi, ne nehimu kew en daan he minge himan kayi te valey he zutun ed-ubpà is Megbevayà pinaagi te Wagas he Mulin-ulin.

Is Baal ni Pablo Ziyà te Kenà Minge Hudiyu

3 ¹Ne tenged kayi te langun, siak si Pablo, is pirisu tenged te kedsundan ku ki Jesu Kristu, layun ku sikiyu id-ampù diyà te Megbevayà. Umba nepirisu a su insangyew ku is Lalag te Megbevayà diyan te keniyu te kenà minge Hudiyu. ²Is Megbevayà, tenged te gagew zin keniyu, duen insarig din kediey he terebahu he iyan igkezeyzey niw. Netuenan ku he nezing niw heini. ³In-eles dengan heini, iyan, impesavut din kediey. Mehitenged kayi, duen ingkepesavut ku en keniyu pinaagi te surat. ⁴Ne emun ebesahan niw heini, egketuenan niw is nesavut ku mehitenged te in-eles dengan mehitenged ki Kristu. ⁵Dengan wazà heini ipezayag diyà te minsan hentei he menusiya, iyan, guntaan, pinaagi te Wagas he Mulin-ulin, impezayag en te Megbevayà diyà te minge epustul wey ebpemeneuven din. ⁶Ibpesavut ku keniyu heini is in-eles dengan he sikiyu is kenà minge Hudiyu, pinaagi te kedtuuwi niw te Meupiya he Tudtulanen, edtuvazan kew zaan te Megbevayà te langun he meupiya he idtuvad din te minge Hudiyu. Ne idragkes kew zaan dutun te lawa ni Kristu. Ne egkezawat niw is minge penaad te Megbevayà tenged te kebpekidsevaha niw ki Jesu Kristu.

⁷Nehimu a he suluguen te Megbevayà te kedsengyawa te Meupiya he Tudtulanen. Tenged dà te gagew zin kediey wey pinaagi te gehem din imbegey zin kediey heini is ketengdanan. ⁸Siak, lavew kediey is minsan hentei he menge tumutuu te Megbevayà. Ne minsan pa te iyan heini, midtuvazan a te Megbevayà pinaagi te kedsugua zin kediey te kebpenudtul ziyàn te keniyu te kenà menge Hudiyu te Meupiya he Tudtulanen mehitenged te utew lavew he zekelà he kenà egketegkad he meupiya he igketuvad kenitew ni Kristu. ⁹Ne elin daan insugua zin kediey su wey ku ikepesavut diyà te minsan hentei he etew ke hengkey is kedtumana zin te zaan he mid-isip din he ebeelan. Ne wazà dengan heini ipezayag su in-eles te Megbevayà he nenlimbag te minsan hengkey. ¹⁰Umba wazà heini zengan ipezayag su wey guntaan pinaagi zà te menge tumutuu ki Jesus, ibpaahà te Megbevayà diyà te menge kedesenan wey menge egalen diyà te langit ke hengkey kezekelà is ketau zin he wazè med-iring-iring. ¹¹Umba mid-ulaula zin heini su edtumanen din is mid-isip din dengan te wazè pa limbaga is minsan hengkey. Ne nehimu zin en heini guntaan pinaagi te Nengazen tew he si Jesu Kristu. ¹²Ne guntaan tenged te kebpekidsevaha tew ki Jesus wey pinaagi te kedsarig tew kandin, egkehimu en he ebpekeetuvang kiw te Megbevayà pinaagi te ked-ampù ne wazè en igkeeled tew kandin. ¹³Ne tenged kayi te langun, kinahanglan, menge suled, he kenà igkeawà te kedsarig niw heini is kemeregenan he egkeantus ku tenged keniyu, kekenà, lipey kew su iyan ibmeupiya niw.

Is Kebmahala Kenitew ni Jesu Kristu

¹⁴Ne tenged kayi te langun he intuvad kenitew te Megbevayà, edluhuzan ku te ed-ampù is Amey tew he Megbevayà. ¹⁵Is langun he menge tumutuu he zini pa te lumpad wey ke ziyè en be te langit, ne migngезanan din sikandan he pemilya zin. ¹⁶Ne edhengyuan ku sikandin he puun te utew zekelà he gehem din, begayi kew zin te utew melig-en he kedtuu pinaagi te ked-ulini keniyu te Wagas he Mulin-ulin, ¹⁷su wey, pinaagi te kedtuu niw, melumuni is gehinawa niw ni Jesu Kristu. Ne idhangyù ku zaan he hegeti zin wey lig-eni zin is kebmahala niw te minsan hentei. Umba idhangyù ku heini su wey sikiyu, ¹⁸wey is minsan hentei kenitew te menge sakup te Megbevayà, ivegey kenitew is kedsavut ke hengkey is kenà egkesukud he kebmahala kenitew ni Kristu ziyà te gehinawa zin. ¹⁹Berakat he mesavut niw is gagew zin keniyu, minsan pa te kenà heini egkepurung egkesavut te minsan hentei. Egkesuatan ku heini su wey metuman diyan te keniyu is wazè din kurang he kegkeulini keniyu te Megbevayà.

²⁰Edeligen tew is Megbevayà su, pinaagi te zekelà he gehem din he impelumun din dini te kenitew, utew zekelà is egkehimu zin su lavew

pa is egkehimu zin, kenà te minsan hengkey he egkeisip ta he ebuyuen. ²¹Berakat he zeliga sikandin pinaagi kenitew te langun he menge tumutuu zin wey pinaagi ki Jesu Kristu guntaan he timpu wey te wazè din pidtemanan.

Is Kedsevaha te Menge Tumutuu

4 ¹Ne tenged kayi te langun, siak is pirisu tenged te midtuman ku is menge sugù te Nengazen, edhengyuan ku sikiyu he geina te midhimu kew te Megbevayà he menge tumutuu zin, ul-ulaha niw is ulaula he zait he ed-ul-ulahan te tumutuu. ²Kinahanglan he kenè kew pegalbu, kekenà, peketulanged kew wey mebmeinentusen kew. Ipeehè niw is gagew niw ziyà te kada sevaha keniyu pinaagi te kebmepelevayen niw. ³Purungi niw is menge ulaula niw su wey kenà maawà is kegkeupakat niw he imbegey keniyu te Wagas he Mulin-ulin su pinaagi kayi te upakat egkesevaha is gehinawa niw. ⁴Su sikitew is langun he menge tumutuu, sevaha kiw zà he lawa, ne sevaha zà is Wagas he Mulin-ulin he ed-ulin kenitew, ne sevaha zà daan is ebperetengen tew he ketulusan tenged te midhimu kiw he menge tumutuu. ⁵Sevaha zà is Nengazen tew he iyan si Jesus; iyan dà sikandin edtuuwan tew; sevaha zà daan is imbewtismuwi kenitew. ⁶Sevaha zà daan is Megbevayà he Amey te minsan hentei. Iyan sikandin ebayàbayà te minsan hentei he tumutuu, ne ziyà sikandin te minsan hentei he tumutuu, ne edterebahu pinaagi te minsan hentei he tumutuu.

⁷Sikitew is langun, mibegayan is kada sevaha kenitew te ketau sumalà is egkesuatan ni Kristu he ibegey kenitew. ⁸Su zuen insurat he Lalag te Megbevayà he edhenduen te,

“Dutun te kebetuna kandin pehendiyà te langit mezakel is menge vihag din he mid-uwit din.

Ne zuen daan menge ketau he impemegey zin diyà te menge sakup din.”

⁹Ne pinaagi kayi te migkagi he nevatun sikandin, ibpesavut kenitew te Lalag te Megbevayà he midlugtanà sikandin he zaan dini te lumpad te kelibutan. ¹⁰Ne haazà is midhendini te tanà he iyan si Kristu, iyan daan sikandin nevatun pehendiyà te langit wey minsan diyà dapit te utew metikang he langit. Ne umba mid-ulaula zin heini su wey mehimu he ziyà sikandin te minsan hendei te tivuuk he kelimbagan.

¹¹Iyan menge ketau he imbegey zin kenitew is: is duma, midhimu zin he epustul; ne is duma, midhimu zin sikandan he peneuva te Megbevayà; ne is duma, ne imbegey zin kandan is ketau wey zan ikesangyew is Meupiya he Tudtulanen; ne is duma pa, ne imbegey zin kandan is ketau wey zan meuwit wey mepenurù is menge tumutuu. ¹²Umba imbegey zin heini is menge ketau su wey kiw mehimani ne wey tew meulaula

is ebpeveelan kenitew te Megbevayà ne wey melig-eni is kedtuu tew te minge tumutuu he iyan lawa ni Kristu. ¹³Pinaagi kayi egkehimu human he egkesevaha kiw te kedtuu tew wey kegketueni tew te minge ulaula te Anak te Megbevayà. Ne zutun egkepurung egkeheget is kedtuu tew ki Jesus ne zutun wazà kurang te minge ulaula tew iring te wazà daan kurang te minge ulaula ni Kristu. ¹⁴Dutun ne egkehimu he kenè kiw en ebpekeiring te vatà su is etew he iring dutun ne egkehalinhalin is kedtuu zin su melemu ebpeketuu te minsan hengkey he tuluuwen he ibpenurù kandin te minge teruen he etew he metau he edlimbung. ¹⁵Ne sikitew mulà, kinahanglan he tutuu is ibpesavut tew ziyà te minge zuma tew tenged te mahal sikandan dini te gehinawa tew. Ne pinaagi kayi ebpekeiseg is kebpekeiring tew te minsan hengkey he ulaula ni Kristu. ¹⁶Su iring kiw te lawa, ne sikandin iyan ulu. Ne sikitew is lawa, ne ebpekesarig kiw kandin te ulu. Ne is minsan hengkey he parti kayi te lawa, ne ebpekesarig daan te minge zuma zin he parti. Ne emun hustu is baal zutun te kada sevaha he parti, edtulin haazà is tivuuk he lawa pinaagi te kebpekedtetevangà te minsan hendei he parti zin. Ne sikitew zaan, ebpekeiseg is kebpekeiring tew te ulaula ni Kristu pinaagi te kebpurung te kada sevaha te zuma zin.

Is Begu he Kineiya

¹⁷Tenged te sugù a te Nengazen, ebpeketelteleenan ku sikiyu he engkezi niw en is minge mezaat he ulaula he iyan ed-ul-ulahan te minge etew he kenà edtuu te Nengazen wey wazà pulus te ed-isipen dan. ¹⁸Wazè dan hanew te hustu he ibayà ne wazè dan untung he ibegey te Megbevayà, geina te nengepaglung sikandan tenged te kezesen te gehinawa zan. ¹⁹Kenè dan en igkeeled is minsan hengkey he ulaula zan he mezaat. Ne kenè dan daan ed-egenen is mahawag he kebayà te lawa zan, kekenà, utew zan en egkesuati is meremerik he ulaula.

²⁰Ne sikiyu mulà, dutun te kebpeketuu niw ki Kristu, kenà iyan heini sikan is impenurù keniyu. ²¹Tutuu iyan he impesavut keniyu is keagi ni Kristu ne impesavut daan keniyu is tutuu he tuluuwen he impenurù din. ²²Tenged kayi engkezi niw is minge isip te zaan he kegkeetew niw su nesakup heini te zaan he minge mezaat he ulaula niw. Ebpekezezaat keniyu heini pinaagi te ebpemekelimbung he kebayè din. ²³Kinahanglan he egkepurung egkevegu is isip niw wey gehinawa niw. ²⁴Kinahanglan he edhimuwen kew he vegu en he etew he iyan sikan is begu en he linimbag pinaagi te zagwey te Megbevayà. Egketuusan heini is begu he etew pinaagi te minge tutuu wey metazeng he ulaula he ibpeulaula keniyu te Megbevayà.

²⁵Umba, minge suled, engkezi niw is kedtarùtarù. Kinahanglan he tutuu is egkegiyen niw ziyà te minge zuma niw. Su nesevaha kiw he

puđu parti te lawa ni Kristu. ²⁶Emun duen igkepauk niw tigkera niw is gehinawa niw su kela ke ibpekesalè niw. Ne kinahanglan he te kenè pa edsanlep is andew iawè niw en is pauk te isip niw. ²⁷Kenè niw itugut he pinaagi te pauk niw, ne mevintahai kew ni Setanas. ²⁸Is tekawen, engkezi zin is kebpenakew ne medterebahu su wey hustu he paagi is kekguwaa zin te igkeuyag din ne wey metevangi zin is egkengeayuyu. ²⁹Kinahanglan he kenà ebpekezezaat is kebpmèbè niw, kekenà, iyan kegiya niw is minge lalag he ebpekevegey he tavang te kedtuu te minge zuma niw su wey zekelà is pulus diyà te ebpemineg sumalà is egkinehnglanen dan. ³⁰Ne kenè niw ul-ulaha is minsan hengkey he kenà egkesuatan te Wagas he Mulin-ulin su iyan sikandin tuus diyan te keniyu he gaked kew te Megbevayà, wey tuus daan he keuzemà egkeuma is andew he zutun edhimesaza te Megbevayà is langun he nepuunan din en he vaal te kedlibriya zin keniyu te kebpekesalà. ³¹Engkezi niw is kebpekunkuntedehè niw. Kenè kew meepes wey mepauk te zuma niw. Kenè kew pekid-eget; kenè kew ituk; kenè niw itugut he ibmezaat te gehinawa niw is minsan hengkey he ulaula te zuma niw, ³²kekenà, mebpepurpurungè kew te kada sevaha keniyu. Mebpehidhizuwè kew, mebpepeseseyluwè kew iring te mibpesaylu kew te Megbevayà tenged te kebpekidsevaha niw ki Kristu.

Is Kerayag wey Kerusireman

5 ¹Ne geina te pinelanggè kew he minge anak te Megbevayà, kinahanglan he mekeiring kew kandin. ²Kinahanglan he ipeehè niw layun he mahal ziyà te gehinawa niw is minge zuma niw iring te mahal kiw ziyà te gehinawa ni Kristu. Mibpehimatey sikandin he elili kenitew wey kiw zin melibri. Nehimu heini he pemuhat he utew mehemut, *he ke và dà egkegiya, utew egkesuati te Megbevayà.*

³Ne geina te minge sakup kew te Megbevayà kinahanglan he kenè niw ul-ulaha is keleleged wey is minsan hengkey he ulaula he meremerik. Kenè niw hileveti is kenè niw esawa. Minsan is ked-isipa wey kekgegiya kayi ne kenè niw ul-ulaha. ⁴Kenè niw gemita is minge meremerik, mahawag, wey wazè din pulus he minge lalag, kekenà, layun dekelà is kebpelemati niw te Megbevayà. ⁵Su ibpesavut ku keniyu is utew tutuu. Is etew he meremerik is ulaula zin wey ke edhilavet te kenè din esawa, ne kenà sikandin egkehedian ni Kristu wey te Megbevayà. Ne iring din ded daan is legezen he etew su is minge vutang he igkelegezi zin, egkehimu he minge megbevayè din.

⁶Su tenged kayi he minge ulaula, utew egkepeuki te Megbevayà keuzemà is minge etew he kenà ebpemineg te minge sugù din. Ne tenged dutun, kenè niw itugut he meketuu kew te tarù he penurù te minsan hentei he etew pinaagi te minge ketezengan dan he kenà tutuu. ⁷Kenè

kew mebpکید-upakat te minsan hentei he iring kayi. ⁸Su zengan utew merusirem is ibayè niw, iyan, guntaan neteyawan is ibayè niw su nehimu kew en he menge sakup te Nengazen. Ne tenged kayi, kinahanglan he zait is ulaula niw te ked-ikula niw te merayag he ibayà. ⁹Su emun neteyawan te Megbevayà is isip niw, egkeulaula niw is langun he hustu wey metazeng he vaal he ibpenurù te tutuu he tuluuwen. ¹⁰Purungi niw istudyuwi ke hengkey is menge ulaula he egkesuatan te Nengazen. ¹¹Is menge etew he kemulu pa ziyà te kerusireman, kenè kew medtampu kandan te ed-ulaula te menge vaal he wazè din pulus, kekenà, ipeehè niw he mezaat is menge vaal zan. ¹²Su is menge vaal he id-eles dan, utew mekeeled-eled minsan is kebenteeni zà kayi. ¹³Ne pinaagi te kerayag, *he ke và dà egkegiya, is tutuu he tuluuwen, egketuenan dan ke hengkey is ed-isipen te Megbevayà dutun te menge ulaula zan, ne zutun egkehimu he egketeyawan daan is isip dan.* ¹⁴Ne mehitenged kayi zuen erubasa he edhenduen te,

“Sikew is edlizepeng, gimerat kad;
sikew is minatey, ne mevanhew kad
ne egketeyawan ka ni Jesu Kristu.”

¹⁵Umba, menge suled, pekeventayi niw is menge ulaula niw su wey kew mehimu he menge metau, ne kenà menge paglung. ¹⁶Te minsan keenu, ke zuen meupiya he egkeveelan niw, beeli niw en su guntaan he timpu mezelang is ebaal te meupiya. ¹⁷Kenè niw ul-ulaha is wazè din pulus he ulaula, kekenà, purungi niw sevuta ke hengkey is ebpeveelan keniyu te Megbevayà.

¹⁸Kenè kew mebbelelangut te vinu su ebpekezezaat heini keniyu, kekenà, kinahanglan he egkepurung kew egkeulini te Wagas he Mulin-ulin. ¹⁹Emun ebpelelelagè kew, gemita niw is menge lalag diyà te menge Salmo wey menge kentahan he idalig te Megbevayà, wey menge kentahan he ibpinted keniyu te Wagas he Mulin-ulin. Kentahi niw is Megbevayà ne pinaagi kayi te menge kentahan wey te menge Salmo, medlipey kew is edalig te Megbevayà. ²⁰Peselemati niw layun te Amey tew he Megbevayà is langun he tuvad din keniyu tenged te kedsundan niw te Nengazen tew he si Jesu Kristu.

²¹Mebpetetehuzè kew te kada sevaha tenged te kedtahud niw ki Kristu.

Is Sambag Diyà te Teleesawa

²²Sikiyu is menge vahi, pesakup kew te menge esawa niw iring te nesakup kew en te Nengazen. ²³Su is maama, duen din kegehém te kebayaàbaya te esawa zin, iring te si Kristu, duen kegehém din te kebayaàbaya kenitew te langun he menge tumutuu he iyan lawa zin. Midlibri kiw zin te silut is lawa zin. ²⁴Ne iring din ded daan kinahanglan he mebpsakup mebpurung is bahi te esawa zin iring te ebpsakup kiw ki Kristu is menge tumutuu zin.

²⁵Sikiyu is menge maama, kinahanglan he mahala niw ziyà te gehinawa niw is esawa niw iring te mahal kiw is menge tumutuu ziyà te gehinawa ni Kristu. Egketuenan tew heini su mibpehimatey sikandin he elili kenitew wey kiw zin melibri te silut, ²⁶ne wey kiw mezawat te Megbevayà. Midhimu zin heini pinaagi te kedlumpiyuwi zin kenitew pinaagi te kebewtismu wey pinaagi te lalag din. ²⁷Elin daan idhimuwa zin kayi su wey kiw zin mezawat he esawa zin. Ne wazè en igkesawey zin kayi te kenitew su nepurung kiw en melumpiyuwi ne utew kiw mekempet diyà te kandin. ²⁸Ne iring din ded daan is maama, ne kinahanglan he mahala zin diyà te gehinawa zin is esawa zin iring te kebmahala zin te keugelingen din he lawa. Su is kebmahala zin te esawa zin ne iyan ded daan kebmahala zin te keugelingen din he lawa, su is teleesawa, sevaha zà sikandan he lawa. ²⁹Wazà etew he kenè din ebmahalen is keugelingen din he lawa, kekenà, ibpekaan din ne ebpurungan din iring te kebpurungi ni Kristu te keugelingen din he lawa. ³⁰Ne iyan kiw is menge tumutuu, lawa ni Kristu. ³¹Tenged kayi, duen insurat he Lalag te Megbevayà he edhenduen te, “Ed-ewaan te maama is iney zin wey amey zin ne ebpengesawa, ne sikandan is dezuwa, is maama wey haazà is bahi, ne egkesevaha zà.” ³²Duen impezayag te Megbevayà kenitew kayi he utew tutuu, ne sumalà is kedsevuta ku kayi ne iyan ibpesavut din si Kristu wey sikitew is menge tumutuu. ³³Iyan, kenà duen dà taman su egkehimu zaan he elin egkegiyen din is teleesawa. Kinahanglan he mahala te maama is esawa zin ne kinahanglan daan he tehuza te vahi is kandin he esawa.

Is Sambag Diyà te Memegurang wey Menge Vatà

6 ¹Sikiyu is menge vatà, kinahanglan he tumana niw layun is menge sugù te menge ginikanan niw su ke tumutuu ki te Nengazen he si Jesus, iyan heini hustu he ulaula.

²Duen insugù kenitew te Megbevayà he edhenduen te, “Tehuza niw is amey niw wey iney niw.” Ne heini he sugù, ne iyan nehuna he sugù he midsumpulan din te penaad su ³ke sikandin daan te, “Emun edtumanen niw heini ne edtuvazan ku sikiyu te meupiya ne ebmelugayad is untung niw zini te kelibutan.”

⁴Ne sikiyu is menge ginikanan, kinahanglan he kenà igkepauk te menge anak niw is paagi niw te kebpenurù kandan, kekenà, ipenurù niw kandan is menge ulaula he zait te menge tumutuu, ne iyan niw isambag kandan is sambag he ebpuun te Nengazen tew.

Is Sambag Diyà te Menge Egalen wey Menge Suluguen

⁵Sikiyu is menge suluguen, purungi niw tumana is menge sugù keniyu te menge egalen niw zini te kelibutan. Tehuza niw sikandan ne

kinahanglan he ebpuun te meupiya he gehinawa niw is kedtumana niw te minge sugù dan iring te iyan si Kristu edsugù keniyu. ^{6,7}Kinahanglan he layun meupiya is baal niw ne kenà dutun dà te ebentayan kew te egalen niw su kinahanglan he kenà iyan dà ebpekezalig te vaal niw is etew, kekenà, elin daan is Megbevayà su minge suluguen kiw zaan ni Kristu ne kinahanglan he edtumanen ta is ebpeveelan kenita te Megbevayà tenged te ebpuun te keputian te atey ta is kedtumana ta kayi. Kinahanglan he meupiya is gehinawa ta zutun te vaal ta iring te iyan ebayàbayà kenita is Megbevayà ne kenà iyan dà is egalen ta zini te kelibutan. ⁸Su minsan ke suluguen ki, wey ke kenà, netuenan ta he ke meupiya is baal ta, ne meupiya zaan is idsuhul kenita te Megbevayà.

⁹Ne sikiyu is minge egalen, iring din ded daan kayi is ul-ulaha niw ziyà te minge suluguen niw. Kenè kew mebpelihakendek kandan su netuenan niw he sikitew is langun, ke suluguen ki wey ke egalen ki ve, ne zuen gihapun egalen ta ziyà te langit he iyan is Megbevayà ne wazè din ibpelavi te minsan hentei.

Is Minge Himan te Kebpekidebek te Tumutuu

¹⁰Minge suled, ketepusan heini he minge lalag ku keniyu: kinahanglan he lig-eni niw is kedsarig niw te Nengazen wey te lavew he zekelà he gehem din. ¹¹Gemita niw is langun he minge himan te kebpekidebek he ibegey te Megbevayà su wey kew mekesukul ki Setanas emun egemiten din is ketau zin te kegkeiza zin keniyu. ¹²Su kenà iyan edtebeken tew is minge etew zà duen, kekenà, iyan edtebeken tew is minge mezaat he kedeseenan he ziyà ed-ubpà te langit wey is minge kenà egkeahà he hadi, wey minge egalen, wey minge ebayàbayà te langun he minge mezaat he etew he nesakup te kesusireman guntaan dini te kelibutan. ¹³Umba, minge suled, gemita niw en is minge himan te kebpekidebek he imbegey te Megbevayà. Su zutun emun egkeuma haazà is timpu he zutun utew meregen is kedtebeka te minge mezaat, ne egkesukulan niw is minge kuntada niw ne emun egketapus en haazà is tebek ne wazè kew meewai te zesen.

¹⁴Ne tenged kayi, andam kew en. Layun tutuu is egkegiyen niw wey ed-isipen niw ne iyan heini bakes niw. Ul-ulaha niw layun is metazeng he ulaula ne iyan heini limbutung niw. ¹⁵Andam kew layun te kebpenudtul te Meupiya he Tudtulanen mehitenged te kelinew he ibegey te Megbevayà, ne iyan heini sepatus niw. ¹⁶Ne iyan utew kinahanglan is: layun kew sarig te Megbevayà ne iyan heini kelasag niw ne pinaagi kayi kenè kew egkesugat te minge egkeregreg he panà ni Setanas he iyan is minge penuley zin keniyu. ¹⁷Ne zewata niw is kedlibriya keniyu te Megbevayà su iyan heini kalù niw he putew. Ne gemita niw layun daan is Lalag te Megbevayà su iyan heini sundang he ibegey keniyu te Wagas he

Mulin-ulin. ¹⁸Pekezesen kew ampù te minsan hengkey he timpu sumalà is ked-uwita keniyu te Wagas he Mulin-ulin. Buyù kew te tavang te Megbevayà ne layun kew andam ne peniguduwi niw layun te ked-ampù is langun he menge tumutuu. ¹⁹Ne iampù a zaan keniyu he ivegey kediey te Megbevayà is ketau te kebpenudtul te lalag din. Ne iampù niw zaan he kenà a mahandek, kekenà, ivegey kediey is hustu he egkegiyen wey ku ikepesavut is Meupiya he Tudtulanen he in-eles dangan. ²⁰Umba nehimu a he suluguen te Megbevayà su wey ku ikepenudtul heini is Meupiya he Tudtulanen. Ne tenged daan kayi te kebpenudtul ku, nehimu a he pirisu. Umba, menge suled, iampù a su wey kenà a mahandek te kebpenudtul su iyan heini ketengdanan he imbegey kediey te Megbevayà.

Is Kebpengemusta

²¹Si Tikiku is minahal tew he suled wey metinumanen he suluguen te Nengazen tew, iyan ebpeketudtul keniyu mehitenged te kebpekesavuk ku wey ke hengkey is egkeulaula ku kayi. ²²Umba edsuguen ku sikandin diyan su wey niw metueni ke hengkey is kebpekesavuk dey zini su wey meheget is kebpekesarig niw te Megbevayà.

²³Is Amey tew he Megbevayà wey is Nengazen tew he si Jesus, berakat he sikiyu is menge suled dey, tuvazi kew zan te melinawen he kebpekesavuk, wey ipeehè dan keniyu is kebmahala zan keniyu ziyà te gehinawa zan wey hegeta zan is kedtuu niw kandan. ²⁴Berakat he ikegagew te Megbevayà is minsan hentei he kenà egkeawà diyà te gehinawa zin is kebmahala zin te Nengazen tew he si Jesu Kristu.